

Anto Stanić

**ZLATNI STIHOVI**

Fojnica, 2002.

**Anto Stanić:**  
**ZLATNI STIHOVI**

**Urednik: Ivo Mijo Andrić**

**Recenzenti: Ivo Mijo Andrić**  
**Momir Jolović**

**Grafičko uređenje: Predrag Ilić**

**Sve ideje o uspjehu brate  
Od Boga su u glavu im date.**

Autor

## FORMULA USPJEHA

$$1+1 = 3$$

$$3+3=7+x$$

$$8:7$$

**PRINCIPI USPJEHA**  
**Podsjetnik za one koji žele uspjeti**

**Od danas počinje novi život  
Sve zadatke radit ću odmah.**

**Neću se više podcjenjivati  
Niti ću dozvoliti  
Da me drugi podcjenjuju.**

**Dočekati ću novi dan  
S ljubavlju i osmijehom.**

**Ja sam čudo prirode  
Rođen sam da pobjeđujem  
I da slavim pobjede.**

**Svaki posao i zadatak  
Uradit ću s najviše znanja  
I mogućnosti.**

**Danas ću biti gospodar  
Svojih osjećanja  
Smijat ću se svakome ljubazno.**

**Iskoristit ću svaku šansu  
Neću više čekati zlatnu kočiju.**

**Nikada više neću dočekati novi dan  
Bez plana rada.**

**Uvijek ću tražiti sjeme pobjede  
Čak i u nesreći.**

**Moli Boga za mudrost  
Neka Bog bude uvijek uz tebe.**

**Istraj dok ne uspiješ.**

**Ako postaviš cilj  
Nećeš izgubiti put.**

## PROSLOV

### ZLATNI STIHOVI ZA ZLATNE DJEČAKE

U novembru 1963. godine udružismo se u zajednički život Luca i Ja. Njoj niti punih šesnaest godina, meni dvadeset prva.

Mladalački snovi o lijepom životu bez truda i znoja, bez trnja i žuči, srušise se brzo. Morali smo se prihvatiti posla, boriti se, razmišljati i zazivati pomoć Božiju. Morali smo rješavati nimalo jednostave životne probleme.

Udružena ljubav u prvoj godini zajedničkog života donese nam sina Zvezdana. Uz njega nam zvijezde postadoše bliže. Poslije dvije godine, rođenjem nas obradova i svjetlost nam pojača sin Svjetlan.

Rađanje djece rađa i nove obaveze. Raste roditeljska odgovornost za osiguranje ljepše i izvjesnije budućnosti. Vizija boljeg života odvodi nas, sada već dalekih šezdesetih godina prošloga stoljeća (i milenija), u Njemačku. Tu radimo teške poslove i maštamo o svom domu. Uz rad, snove i maštanja, ljubav nam podari i trećega sina: Gorana.

Baka Anđa preuze obavezu čuvanja tri zlatna unuka. Ali brzo posustade i mi se vratismo kući nakon pet godina rada u Njemačkoj. Okušasmo se u u gostiteljskom biznisu, ali ugostiteljski posao u to vrijeme nije donio željene rezultate. Zbog toga ponovno odlazimo u Njemačku, gdje radimo "na crno" po 16-20 sati, kako bismo zaradili novce za novi početak.

O djeci se brinula baka Anđa. Nije joj bilo nimalo lako sa tri, sada već nestašna dječaka. No izdržala je do našeg povratka iz Njemačke. Ja se tih godina zapošljam u osiguranju, a Luca u ugostiteljstvu. Radili smo i borili se za viši standard koristeći stečena njemačka iskustva.

Tokom 1984. godine otvaramo prvu privatnu prodavnicu. Ta prodavnica postaje klica iz koje, u 18 godina napornog rada i odricanja, izniče 11 novih preduzeća. Najveći teret na tome putu nosila je Luca koja je, uporedo s drugim poslovima, odgajala djecu. Zahvaljujući njezinom majčinskom trudu i uz Božiju i moju pomoć, Zvezdan, Svjetlan i Goran izrastaju u sposobne menadžere razvijajući biznis na području Bosne i Hercegovine, Hrvatske, u Kreševu, Sarajevu, Splitu i Zagrebu.

Njihovim radom, znanjem i predanim angažmanom Holding "Stanić" postaje snažna tvrtka, koja ove godine obilježava 18 godina uspješnog poslovanja i razvoja. Godine su to uspona koji vraća nadu u mogućnosti našega društva da se priključi razvijenom svijetu.

Iz velike zahvalnosti za postignute poslovne i životne uspjehe i za osobnu, obiteljsku i društvenu promociju rada i stvaralaštva, tata im posvećuje i daruje ovu knjigu pjesama sa željom da nastave započeto i da šire dobro i sreću među ljudima. Tri naša sina, tri zlatna dječaka i tri zlatne nevjestice: Irena, Vesna i druga Irena, sa sedmero zlatnih unučadi, zaslužuju da ih kroz život prati pjesma, jer pjesma je dar božiji i vrhunac radosti i životnoga zadovoljstva.

Radeći u Njemačkoj često smo igrali loto, moleći Boga da dobijemo novac, te da se vratimo svojim dječacima u domovini i tu izgradimo vlastiti dom za miran i sretan život. Glavni zgoditak na lotu nismo dobili, ali jesmo dobili najveću premiju sa tri naša sina. Ne ostvaruje Bog želje uvijek u očekivanom vremenu i obliku, već u onome koji nam je sudbina odredila. Ponekad ih ostvaruje u još ljepšem i poželjnijem obliku, kako se to meni i Luci posrećilo.

Kako po staroj narodnoj mudrosti nije dobro prekomjerno hvaliti svoju djecu, prepustit ću da o njima govore njihova djela, koja stvoriše u proteklih deset godina. Ono što kao otac mogu reći, jeste da im želim da nastave sa istim entuzijazmom i s još većim uspjesima za svoje dobro i za dobrobit naroda u sredinama gdje žive i rade.

Na tome putu rada i stvaranja, snagu i ideje uvijek smo crpili iz principa koji su od Boga dati. Zato je stih: " Sve ideje o uspjehu brate, od Boga su u glavu im date", postao motto svih naših pregnuća i uspjeha.

Klicu života usadismo im Luca i ja, a Bog im dade ideje i principe koje su znali prepoznati i koristiti u životu i radu. Mama Luca i danas se bori svom snagom da kapital ne zarobi dušu naših sinova i njihove djece. Da ne naruši harmoniju koja vlada u našim obiteljima. Jer novac, slava i bogatstvo prolazni su, a dobrotu, ljudskost i sloga opstaju i vječno traju. Za vlastitu sreću i za dobro svih.

Zato zlatnim dječacima na kraju ovog uvodnog slova poručujem: Sijajte dobrotom, jer samo ona ima pravi i trajni sjaj. I sretno vam bilo. I vama i vašim obiteljima, za vaše za dobro svih nas.

**Autor**

**ZA MOJE NAJDRAŽE**



## MOJE STABLO

U podnožju planine Inča  
Počinje moga stabla priča  
Kinta Kunte po imenu Mijo  
Tu on svoje gnijezdo je savio.

Mijin djeda iz Dalmacije pođe  
Za pašom u Kiseljak dođe  
Sedam braće izdijeli se dolje  
Tijesno postade kiseljačko polje.

Sa familijom i sa stokom pođe  
U Kamenik sadašnji dođe  
Tu nikoše i štale i kuće  
Vrijeme leti ko da bješe juče.

Šukun Miji štimaše planina  
Sa ženom rodi on četiri sina  
Jedan od njih što je tu poniko  
Po imenu moj djeda je Niko.

Djeda Niko dvaput se oženi  
On porodi oca Luku meni  
Još tri kćeri i tri fina sina  
Selo raste velika milina.

Majka Jela i otac mi Luka  
Ne bojaše se ni mraka ni vuka  
Po imanju sirotinja bješe  
Osmero djece na svijet doniješe.

Brat i sestra mladi su umrli  
A ostali i danas su živi  
Ivica je svoje sidro digo  
U daleku Australiju je stigo.

Slavo, Pero i Anto ponosni  
Ostadoše svi u Srednjoj Bosni  
Ja sam Anto i pronađoh Lucu  
Vrlo mladu odveo je sudcu.

Odobriše maloljetnoj braka  
Luca posta maloljetna majka  
Krv Stanića i Ljiljića roda  
Spojiše se ko čarobna voda.

Porodismo tri sokola mila  
Vila im je na krštenju bila  
Dala im je blagoslov i ime  
nek se ljudi njima sada dive.

## MAJKO HVALA TI

Majko hvala ti  
Na tegobi bremena  
Na bolu u porodu  
Novoga života  
Na noćima neprospavanim  
Na majčinoj brizi  
Oko svoga čeda  
Da uspravno ide  
I da život gleda.

Hvala ti  
Za sve živote  
Za sve ljepote  
Za heroje  
Za umove svijeta  
Za život što cvjeta  
Za sav ljudski rod  
Što tvoj je plod.

Majko  
Sve si nas rodila  
Borbu si vodila  
Kroz vijekove puste  
Kroz magle guste  
Krv si lila  
Neuništiva si sila.

Tražila si sreću  
U mirisnom cvijeću  
Tražila slobodu  
Svome rodu  
I svome plodu  
Majko.

## POSVETA MAJCI

Ima li išta ljepše od majke  
Ima li toplije riječi od majčine  
Ima li mekšeg skuta od majčinog  
Ima li nježnije ruke od majčine.

Zar srce majčino nije jače  
Čak i od najtvrdjeg kamena  
Zar srce majčino nije šire  
Od nepreglednog oceana.

Zar srce majčino nije plemenitije  
Od neugasivog sjaja platine  
Zar srce majčino nije nježnije  
Od rascvjetane georgine.

Zar majka nije najljepše biće  
Koje nam daruje ljubavni sjaj  
Majka je vrhunac naše sreće  
Što se doseći ne može znaj.

## LUCA I JA

Olovčice opiši mi sada  
Ono što se dogodilo tada  
Te daleke šezdeset i treće  
Kad je jesen osušila cvijeće.

Ubiše nam Džona Kenedija  
Tužna vijest stiže sa radija  
U Dallasu američkom gradu  
Ugasiše demokratsku nadu.

Istog dana u večernje sate  
Grupa ljudi što činiše svate  
Krenula u Ratkoviće da krađu  
Za Stanića maloljetnu mladu.

Mlada Luca nadala se među  
Nije znala da ide u bijedu  
Dan osvano a sveta je Kata  
Snijeg pao zatrpao vrata.

Na meni je kaput školskog druga  
A Lucu osvojila tuga  
Soba prazna u njoj mladih dvoje  
Započeli budućnost da kroje.

Maštali su kud će i kako će  
Voljeli se znali su šta hoće  
U šesnaestoj Luca rodi sina  
Javila se vila sa visina.

Budi sretna i ponosna mati  
Hrvatska će zemlja njega zvati  
Otac Anto radost i ne krije  
Dok se s društvom veseli i pije.

Maštao sam da ću pisat knjige  
I riješiti materijalne brige  
Dani teku dvije godinice  
Na svijet dođe još jedno lice.

Drugi sinak rodila ga majka  
Kakvo dijete to je samo bajka  
Isti korijen ko starijeg brata  
On otvara svuda zlatna vrata.

Vrlo skromno živjelo se ljudi  
Nek se niko odluci ne čudi  
Da idemo u Njemačku radit  
Bolje sutra mi moramo gradit.

Radilo se noću i po danu  
I bolja nam budućnost osvanu  
U Njemačkoj u Gmindu gradu  
Mi dobismo treću bebu mladu.

Treći sinak sokolova oka  
Sve kritički gleda sa visoka  
On probleme rješava na vrijeme  
Kroči naprijed bez ikakve treme.

Tri sokola, tri mlađana ptica  
Svaki zase posebna je priča  
Sva tri dobra hvala dragom Bogu  
Dosad nema ničeg što ne mogu.

Sve ideje o uspjehu brate  
Od Boga su u glavu im date  
Zvezdan, Svjetlan i najmlađi Gogo  
Bože dragi ti si nam pomogo.

Ja i Luca ponosni smo na to  
I nevjeste naše su ko zlato  
Od platine unuke nam daše  
Sve je veće sretno pleme naše.

Putevima sigurno gazimo  
Kuda ćemo svi dobro pazimo  
Preko trnja il crvenih ruža  
Mi gledamo kud se staza pruža.

Dok nas sunce grije sa visina  
Ponosni smo na tri zlatna sina  
Dragi Bože daj im blagoslova  
Da pozlate ova moja slova.

## NA SKIJANJU

Junaci priče: Ana Marija, Nina,  
Toni, Sara, Štefko i Kiki

Dogodi se ko u nekoj priči  
Na skijanje krenuše Stanići  
U Austriju u planinsko mjesto  
Gdje skijaši vraćaju često.

Dan odmora prijao je nama  
Drugog dana svi su na skijama  
Staro, mlado samo jedno muči  
Ko će bolje skijanje da uči.

Nastavnik im nova znanja daje  
Osim Sare nitko se ne kaje  
Ni zbog truda ni zbog silnog znoja  
Ni žestokog takmičarskog boja.

Za par dana naučiše moji  
Kako da se na skijama stoji  
Skije voze niz strmine puste  
Kroz kapije i magline guste.

Oko škole Štefko nam je mrdo  
Vidio je da je svuda tvrdo  
Svoju hrabrost na visinu diže  
Niz padinu on najbrže stiže.

Jednog dana nađoše rješenje  
Za dječicu bit će takmičenje  
Vozit će se slalom nije šala  
Takmičare briga je spopala.

Cijelu noć ih drži nesаница  
Svi sve znaju nema neznanica  
Biti prvi velika je muka  
Biti zadnji još je veća bruka.

Svanulo je, djeca skije drže  
U mislima svi voze najbrže  
Nina viče: pomoz mi Bože  
Ako padnem ništa se ne može.

Toni hrabar i ponosan momak  
Kosa prede može na nju bobak  
Ana viče: Najbolja sam zna se  
Nikom ne da ni u snu predase.

A ostali oborili glave  
Svi bi rado pobjegli iz jave.

Sudac zove i pištaljkom pišti  
Počinjemo nek niko ne vrišti  
Voze djeca nepoznata roda  
Brzi slalom on je sada moda.

Na redu su i unuci moji  
Redosljedom kako sada stoji  
Prva vozi Ana-Marija  
Mili Bože kako dobro skija.

Slalom vozi brže od Janice  
Za tren oka pređe sve granice  
Poslije Ane na stazi je Nina  
Ljudi misle – paklena mašina.

Snijeg raznosi sve se za njom praši  
Bimbo veli: gdje su tamburaši  
Nek se pije uz bogata jela  
Nina stazom prođe kao strijela.

Još urlici nisu ni prestali  
A Toniju start su odsvirali  
Jurno Toni odozgo na dolje  
Niko drugi to ne može bolje.

Navija se: Ana-Nina-Toni  
U ušima još nam buka zvoni  
Ja ponosa kod bakice Luce  
Najbolji su grijalo ih sunce  
Dedi Anti i srce se steže  
Od suzica jedva se usteže.

Kiki zove gdje je njegov dida  
Jer je dida oštećena vida  
Sara viče ko neka sirena  
Traži mamu imenom Irena.



Sve to bješe kao lijepa bajka  
Najbolji su rodila ih majka  
Nakon trke fanfare sviraju  
Takmičare najbolje biraju.

Tri Stanića, tri mlađana ptića  
Prva mjesta – istinita priča  
Prvo, drugo i po redu treće  
Slavilo se skoro cijelo veče.

Nina prva na prijestolje stala  
Najbolje je od svih odskijala  
Do nje Toni i Ana-Marija  
Od veselja svako od nas sija.

Ovu pjesmu deda zapisuje  
Nek se širom naše Bosne čuje  
O pobjedi tri najmlađa ptića  
Koji rastu u rodu Stanića.

## **ŽIVOTNI PUTOKAZI**

## **ŽIVOTNI PUTOKAZI (Tebi i meni)**

Tko to zna  
Zašto se rodismo  
Ti i ja  
Žašto na život dođosmo  
Kuda to pođosmo  
I šta zborimo.

Milioni milja  
Do cilja  
Po putu posutom  
Trnjem i ružama  
Ispred su krivine  
Provalije i dubine  
U ambis nas guraju  
Noge nam poturaju  
Pazi kako hodiš  
Životnom stazom.

Ne žuri ne juri  
Jer put do cilja  
I dug je i kratak  
Gorak je od žuči  
Sladak je od meda  
Tvrđ je od kamena  
Klizav je od leda  
Pazi kako hodiš  
Pazi i šta zboriš  
Šta sve reći smiješ  
I šta ćeš da piješ.

Bježi od svega  
Što je opasno  
Što je preglasno  
I što je strasno  
Što je vani lijepo  
Unutra je slijepo.

## **RASKINI OKOVE**

Čovječe  
Raskini okove  
Koji te drže u tami  
Dotakni svjetlost  
Koja te mami.

Raskini okove  
Što ti zasjenjuju  
Umorni vid  
Riješi se ropstva  
Preskoči zid.

Raskini okove  
I oslobodi  
Ljubav i sreću.  
Okovi čovjeka vuku  
U provaliju veću.

Raskini okove  
Oštrinom pogleda  
I znaj  
Okov je pakao  
Život je raj.

## **POKIDAJ LANCE**

Ustaj  
Razbudi se  
Kreni ka cilju  
Skini zavjesu  
Što ti zasljepljuje vid  
Zamagljuje um  
I okiva glas  
Proglasi svoju slobodu.

Raskini okove  
Vremena  
Premosti obale  
Savršenstvo je tvoj cilj  
Ne budi rob  
Pod teškim bičem  
Strasti.

Pokidaj lance  
Što ti okivaju  
Ljubav i radost  
Rastjeraj tamu  
Uzdigni glavu  
Gledaj s ponosom  
Beskrajne širine  
Diši slobodu.

## URADI SVE DANAS

Sve što možeš  
Uraditi danas  
Ne ostavljaj za sutra.

Sutra je  
Rezervisano  
Za lijeve  
A ti nisi  
Lijen.

Sutra je  
Rezervisano  
Za zle  
A ti nisi  
Zao.

Sutra je  
Rezervisano  
Za slabe  
A ti nisi  
Slab.

Sutra je  
Rezervisano  
Za neuspješne  
A ti si  
Uspješan.

Zato sve uradi  
Danas  
Ne ostavljaj  
Za sutra.  
Jer sutra je  
Novo vrijeme  
Sutra su  
Nova jutra.

## PAZI ČOVJEČE

Mašina radi  
Pod nadzorom tvojim  
Čovječe  
Um tvoj  
Stvorio je nju.  
Tražio si zamjenu  
I sada je imaš  
U posjedu svom  
Sjediš i polako  
Pritiskom na dugme  
Ti upravljaš njom.

Tvoj znak  
I tvoja muka  
Rodili su stablo  
Koje daje plod  
Pazi čovječe  
Oprezno radi  
Za svoj rod.

Stroj nekad podivlja  
Otkáže poslušnost  
I uništi te  
Zato se čuvaj  
Uvijek pažljiv budi  
Za dobro svih ljudi.

## **KNJIGE**

Pisao si knjige  
Ti pametni čiko  
Redajući slova  
Roman je poniko.

Savjeta nam dobrih  
U romanu kaza  
Odredi nam trasu  
Jasnih putokaza.

Čitajući knjige  
Širimo vidike  
Tako razvijamo  
Memorijske slike.



## KNJIGOCID

Slučajno vidjeh  
Pun kontejner knjiga  
Što nisu ničija briga.  
Odvoze ih na vatrište  
Da sagore  
A nas i dalje  
Nesporazumi more.

Mrzimo se  
A u knjigama je  
Toliko ljubavi  
Ne poštujemo se  
Znanja su nam niska  
A knjiga je daleko od nas  
Nije nam bliska.

Mi je bacamo  
Na zgarišta  
Mi lutamo tražeći  
Put ka sreći  
A knjiga nam ga  
Može reći.

Zašto je ništimo  
Zašto je palimo  
Kada je izvor znanja  
Kada nam otvara  
Oči i dušu  
Kada je izvor blagostanja.

## **SMIJ SE**

Smij se  
Kad si u jadu  
Jer i to će proći.

Smij se  
Kad te uspjeh  
Daleko odnese  
Jer i to će proći.

Smij se  
Kad te pritisne bijeda  
Jer i to će proći.

Smij se  
Kad te optereti bogatstvo  
Jer i to će proći.

Smij se  
Onaj što podiže piramide  
Nestade  
Smij se  
I piramide će nestati.

Smij se  
Jer sve što je nastalo  
Nestat će  
Smij se  
Lakše ćeš podnijeti  
Gubitak.

## ORIJENTACIJA U VREMENU

Jučer se rodismo  
Danas jesmo  
A sutra  
Gdje smo?

Jučer nismo žurili  
Danas je kasno  
A sutra?  
Nije nam jasno.

Jučer je prošlost  
Danas trenutak  
A sutra?  
Upitni svanutak.

Jučer je prošlost  
Danas žurno  
Uči – radi  
Moli – voli.  
A sutra?  
Recimo glasno:  
Može biti  
Kasno.

## BESMRTNOM

Izroni ko iz priče  
Njegovo ime  
Visoko niče.  
Rođen da bude najveći  
Krčio je put  
Prema sreći  
Kovač je povijesti nove  
Njegova poruka  
Sloboda se zove.  
Zapalio je baklju mira  
Koja se od ruke  
Do ruke kreće  
Tu baklju nikada niko  
Ugasiti neće.  
Misao njegova  
Ima čudnovatu moć  
Staro ruši  
Jer bolje sutra  
Mora doć.  
Na svim jezicima svijeta  
Biljka zvana mir  
Kao cvijet cvjeta.  
Simbol budućnosti  
Koja zove  
Na pobjede nove  
U život bez gladi  
Gdje se radi  
Za dobro ljudi  
Na rodnoj grudi.  
Život se kreće  
Dok cvjeta cvijeće.

## JUČER JE PROŠLOST

Mogu li pijesak  
Iz pješčanog sata  
Vratiti gore.

Mogu li sunce  
Vratiti tamo  
Gdje je zašlo.

Mogu li greške  
Od jučer  
Ispraviti danas.  
Mogu li opozvati  
Jučerašnje rane.

Mogu li poništiti  
Tragove zla  
Jučer učinjenog.

Mogu li izbrisati  
Bol koja je zadana,  
Jer jučer je prošlost  
Vječno pokopana.

## **PORUKA**

Čitaj  
To je temelj  
Mudrosti.  
Razmišljaj  
To je izvor  
Snage.  
Radi  
To je cijena  
Uspjeha.  
Igraj se  
To je tajna  
Vječne  
Mladosti.  
Smij se  
To je glazba  
Duše.  
Misli o sebi  
To će te odvesti  
Do zvijezda.  
Voli i budi  
Voljen  
To je ljubav  
Od Boga.  
Nađi vremena  
Za sve  
Jer:  
Dan je  
Kraći  
Od Sna.

## **JEDAN JE BOG**

Ljut sam na egoiste  
Jer izmisliše  
Bogove kiše.  
Bog je samo jedan  
Nema ih više.

Ljut sam na sekte  
I razne vjere  
Jer svaka tvrdi:  
Njen je pravi Bog  
A ne poštuju  
Mog.

Ljut sam  
Na vjeroučitelje  
Iz svih vjera  
Jer ne propovijedaju  
Jednoga Boga  
I ne bore se  
Da među ljudima  
Zavladaju  
Mir i sloga.

Ljut sam  
Jer vjerujem  
U jednoga Boga  
Koji sve stvori:  
Zakone kosmosa  
I planeta  
I sva bogatstva  
Ovoga svijeta.

## NEBO PLAČE

Gledam nebo  
Kako plače  
Nekad tiše  
Nekad jače  
Okajava  
Grijehe tvoje  
Lijuć tužno  
Suze svoje.

Nebeske nas  
Kapi kvase  
Sa lica nam  
Tugu brišu  
Pretvaraju  
Naše suze  
U jesenju  
Hladnu kišu.



## UZALUDAN VAPAJ

Stanite  
Svi satovi  
Na svijetu  
Stanite  
I nek vrijeme  
Ne teče.  
Umoran sam  
Život me tjera  
Da žurim.  
Ja ne mogu  
Snaga mi nedostaje  
Poslova nedovršenih  
Svaki dan mi ostaje.  
Nisam pročitao  
Novine od jučer  
Večerao nisam  
Za ponedjeljak  
Prošli  
A pozivi došli.  
Ko hoće  
Na mjesec sjutra.  
Satovi  
Molim vas  
Stanite  
I ne dajte  
Vrijeme da teče  
Proljeće je  
Mirisni behar svuda  
U duši pravi čuda.  
Neka zaljubljenih  
U zagrljaju  
U pravom su raju.  
Dok veselje teče  
Neka vrijeme stoji  
Neka čovjek  
Budućnost skroji.

Stanite satovi  
Da prikupim snagu.  
Stanite...

## **ZA NAŠU ZEMLJU**

Za krv prolivenu očeva naših  
Za živote mlade ugašene  
Za našu jedinu domovinu  
I za nas sinove njene.

Domovino naša u slobodi blistaj  
Čuvat će mo tebe kao očnu zjenu  
Mi sinovi tvoji branit će mo svaku  
Tvoju plodnu stopu krvlju natopljenu.

Učitelji, inženjeri, radnici i profesori  
Trnovitim putem koraci nam hode  
Zato nek se svuda čuje nek se zbori  
Da nikome mi nedamo ni djelić slobode.

Arhitekti, neimari i zidari  
Vrijedni ljudi zemlje ove  
Obnovite porušeno, popaljeno  
Izgradite nove kule i gradove.

## **MOLBA ZA MIR**

Sastanite se svi vladari  
Predsjednici, premijeri  
Kraljevi i kancelari  
I kažite: ne, ne, ne !

Neće biti rata više  
Prestati će suze kiše  
Gladi neće više biti  
Niko neće ružno sniti  
Samo kažite: ne, ne, ne!

Mjesto mržnje bit će ljubav  
Veselje će nastati  
Svijet će tada cio  
Raj zemaljski postati  
Samo kažite: ne, ne, ne!

Sastanite se svi vladari  
Predsjednici, premijeri  
Kraljevi i kancelari  
I kažite: bit će MIR!

## NIKAD NE ZABORAVI

Crveni oblaci  
Rat  
Čelične cijevi  
Avet  
Sijači smrti  
Kosci slobode.  
Gospodar novoga jarma  
Ide bježi kuda?  
Pod zastavu novu.  
Spasitelj podiže ruku:  
Aveti stoj!  
U boj u boj  
Aveti stoj!  
Dosta je ropstva  
Teški su lanci  
Lakša je smrt.

Čelična srca  
Protiv čeličnih cijevi  
Barut, dim, jauci, bol.  
Kroz obruča sto  
Idu okovani  
Traže izgubljeni  
Mir i slobodu.  
U nekom vijeku  
Prolit će rijeku  
Krv domoljubne  
Skinuti lance  
Ispratiti strance  
Živjeti za sutra  
Dočekivat jutra  
Predati se radu  
I imati nadu.

## 1990. – VIZIJA RATA

Crveni oblaci  
Sa istoka  
Halapljivost velika  
Čelične cijevi  
Granate  
Opet  
Nacionalističe  
Plate  
Bratstvo-jedinstvo  
Postade fraza  
Eto ti opet  
Dubokog jaza  
Opet egoizam.

Opet  
Moj Bog  
Bolji od tvog  
Zapali ti  
Kuću moju  
Zaboravi  
Da ću ja  
Tvoju.  
Opet svi  
U boj  
Opet svi  
U stroj  
Svi u lance  
Pa i znance.

Čovječe  
Već jednom  
Nauči i shvati:  
Ne dozvoli  
Da te drugi  
Gura u rat  
I za svoj interes  
Muči i pati.

## **ZVUK RODNOGA KRAJA**

## **JA SAM PRODUKT**

Ja sam produkt  
Moga podneblja  
Moga vremena  
I sjemena.

Ja sam produkt  
Pročitanih knjiga  
Sna i nade  
I majčinih briga.

Ja sam produkt  
Moćne genetike  
Koja rađa  
Sjajne znanstvenike.

Ja sam produkt  
Vlastitoga truda  
Ne očekuj  
Ti od mene čuda.

## MOJ ZVUK

U tihoj noći trepere zvijezde  
Dok zrakom zvone hiljade zvukova  
Slušam i raspoznajem samo jedan.

Čujem zvuk mog rodnog kraja  
Kojega svatko pamtiti ne može  
Zvuk koga nosim u dubini duše.

Naprežem čula pažljivo slušam  
Harmoničnost koja me opija  
Kap s krova pade i zvuka nestade.

Ponovo pokušavam vratiti glas  
Iz rodnoga mi zavičaja  
Ali zvuka nema, nema rodnog kraja.



## **ODLAZAK U NJEMAČKU**

U svitanje prije sunca žarka  
Na stanicu pratila me majka  
Sa majkom je i dragana bila  
Kiša suza niz lice je lila.

Budi dobar najmiliji cvijetu  
Puno sreće u dalekom svijetu  
Riječi su to i jedne i druge  
Srce hoće da pukne od tuge.

Piši sine ublaži nam boli  
Ne znaš kako majka dijete voli  
Grlim, ljubim i jednu i drugu  
Dok napuštam privremeno Jugu.

Zbogom Jugo ti zemljo iz bajke  
Teško bješe gledat suze majke  
Uplakana maše iz daljine  
Tiho zbori: vrati nam se sine.

## **U POSJETI SELU**

U ranu jesen  
Ja posjetih selo  
U boji žutoj  
Bijaše veselo.

Pod blagim suncem  
Kao zlato sija  
Uspomene budi  
I glas emocija.

Iz djetinjstva ranog  
Misli mi se roje  
Najljepše na svijetu  
To je selo moje.

## SELO MOJE

Ratne nemani te uništiše  
Ljudi te ponovo  
Izgradiše  
Ko za taj zločin  
Da se žigoše?

Gledam ti kuće  
Što se na suncu  
Kao zvijezde sjaje  
Starci su u njima  
Nema dječije graje.

Selo drago  
Tkalo si djetinjstvo moje  
Ispredalo moje snove  
Kad će se u tebi roditi  
Generacije nove?

Tražim te u sebi  
Hoću da osjetim  
Miris svježih otkosa  
Hoću da vidim ognjišta  
Dio tvojega ponosa  
Selo moje.

## PROKOŠKO JEZERO

Na visini gdje orlovi kliču  
Ja napisah najdivniju priču  
S drugarima tu provedoh danak  
Izlet bješe ugodan i kratak.

Popesmo se u podnevne sate  
Do ljepote što sa cvijećem cvate  
Tu je pjesma prokoškog slavuja  
Dio toplih zavičajnih struja.

Žubor vode iz bistrih potoka  
U jezero pada sa visoka  
Kao biser u oku mi blista  
Svaka kap je kao zvijezda čista.

O ljepoti Prokoškog jezera  
Pričaju se priče stoljećima  
To je mjesto pravi raj na zemlji  
Kakvog samo u Fojnici ima.

Fojničani vi ste sretni ljudi  
Jer na korak od vašeg pogleda  
Blista voda Prokoškog jezera  
U kojoj se i sunce ogleda.

## RUŽICA

Iz pupoljka ruže  
Razvila se  
Ti si  
Ljepota i boja  
Tvoji su  
Mirisi.

Pčelica malena  
Sletila na cvijet  
Opija se prahom  
Uljepšava svijet.

Ružica i pčela  
Sagradiše raj  
Javi se oluja  
Igri dođe kraj.

Kad oluja prođe  
Sunce opet grije  
Rascvjetaloj ruži  
Pčelica se smije.

Ružice mirisna  
Daj pčelici med  
Nek s njezinog srca  
Otopi sav led.

## **SJENICA**

Zašto pjevaš tužno  
Sjeničice mila  
Ljetos si nam ptico  
Veselija bila.

Zar ni lišće žuto  
Ne pomaže tebi  
Da saviješ gnijezdo  
Ti za zimu sebi.

Il' si možda ljuta  
Zbog odlaska lasta  
I što više nema  
Na njivama plasta.

Veseli se mila  
Nemoj tugovati  
Opet ćeš sa nama  
Zimu zimovati.

## **POKLON**

Poklon je  
Najljepša stvar  
Jer u srcu  
Budi radost  
Dajući životu čar.

Kada poklon  
Ti dobiješ  
I od njega  
Radost imaš  
Dobro pazi  
Od koga ga  
Na dar primaš.

Kad te poklon  
Obraduje  
Nemoj kriti  
Poklon treba  
Prijatelju  
Uzvratiti.

Ako poklon  
Ne prihvataš  
I ne želiš  
Odmah reci  
Da se njemu  
Ne veseliš.

Crven cvijet  
Ako primiš  
Trebaš znati  
To je ljubav  
Koji moraš  
Da uzvratiš.

## OPIO ME MIRIS CVIJETA

Kao pčela vrijedna  
Luto sam po svijetu  
Divio se proljeću  
I proljećnom cvijetu.

Od cvijeta do cvijeta  
Tražio sam meda  
Divio se svijetu  
Što krasno izgleda.

Svijet je ovaj šaren  
I cvjetovi Bože  
Al' se u ljepoti  
Prevariti može.

Razlika je velika  
Od cvijeta do cvijeta  
Po mirisu, ljepoti  
Istina je sveta.

Lutajući svijetom  
Cvijeće za tobom  
Tvoje čari opojne me  
Učiniše robom.

Voljeću te cvijete  
Milovati nježno  
Pisat ću ti pjesme  
Slatka moja čežnja.



## **POMOZI MI BOŽE**

Bože  
Pomozi mi  
Da ispunim srce  
Radošću i srećom  
Mudrošću i snagom  
Da pravim mostove  
Preko kojih će  
Ići samo ljubav;  
Da razlikujem  
Zlo od dobra  
Da nikome  
Ne nanesem bol  
Da pobjeđujem  
Ljubavlju i razumom.  
Napuni moju čašu  
Vinom i ljubavlju  
Da nazdravim  
Svim dobrim ljudima  
Da se opijem  
Ljudskom dobrotom.

## APSOLUTNA SREĆA

Apsolutna sreća  
Ne postoji  
Ti je ne traži  
Sebe ne laži.

Da li zbog Eve  
Što pogriješi  
I kod Boga  
Što sagriješi  
Ne traži je  
Ne postoji.

Da li zbog  
Zakovitosti  
Kosmosa  
ili drugih  
Odnosa  
Ne traži je  
Ne postoji.

Da li zbog  
Ljudskog egoizma  
Koji uvijek  
Traži više  
Da padaju  
Zlatne kiše  
Ne traži je  
ne postoji.

## ČAŠA LJUBAVI

Podižem čašu ljubavi  
I nazdravljam svim ljudima  
Ove planete  
neka svi osjete ljubav  
I zdravi i bolesni  
Crni i bijeli  
I svako dijete.

Napuni Bože ovu čašu  
Ljubavlju svojom  
Neka je svatko popije  
I shvati da si Otac Ti  
Neka se svi nauče voliti  
A zaborave mrziti.  
Neka nestane zavisti  
I ljubomore  
Egoizma i nacionalizma  
I raznih drugih čuda  
Neka iz braće  
Po Bogu  
Izađe misao luda.

## **JA SAM ČUDO**

Nikao sam  
Iz sjemena  
Posijanog  
Od najmudrijih.  
Nikao sam  
Da postanem  
Planina.  
Nikao sam  
Da pobjeđujem  
I slavim  
Pobjede.

Nikao sam  
Hvala Bogu  
Da sve mogu.  
Nikao sam  
I nitko neće  
Imati moj um  
Moje srce  
Moje oči  
Moj sluh  
I moj glas.

Nikao sam  
Kao čudo  
I to se zna.  
Nitko ne može  
Što mogu ja.

## NE ZOVI ME SINE

Prošlo je godina  
Šesnaest  
Kako me baci  
Majka zvana  
U paketu ko mače  
Da plače jadno  
I umre gladno.

I saznade ona  
Da sam živ  
Jesam  
Ali nisam kriv.

Ljudi me našli  
Pa se snašli  
Čiji sam  
Nisu znali  
U dom me dali.

Hladne ruke tuđe  
Bez ljubavi nježne  
Odgojiše mene  
Neke tuđe žene.

Došla da me vidi  
Da li se stidi  
Dok me zove sine  
Neka puknu mine  
Neka je odnesu  
Daleko od mene  
Nek joj srce vene.

Nije ona ljudski rod  
Htjela je ubiti plod.

Recite joj neka ide  
Moje oči više  
Neće da je vide  
Neka mi ne piše  
I nek me sinom  
Ne zove više.

**PUSTI ME DA SANJAM**

## PISMO

Evo pisma stiglo je iz Juge  
Srce mlado da pukne od tuge  
To je priča ali nije jedna  
O djevojci koja pati žedna.  
Žedna je od ljubavi i sreće  
Njen se dragi po Njemačkoj šeće.

Ovo pišem a srce se cijepa  
Djevojka sam i mlada i lijepa  
Pišem pjesmu i draganu pismo  
Volimo se a zajedno nismo.  
U Sarajevu prekrasnome gradu  
Dragi me je upoznao mladu  
Ljubio me pjevao mi pjesme  
Šetali smo kroz sokake tijesne.  
Slušala sam u zanosu priče  
Divila se kako ljubav niče.  
Kako raste i u nama klasa  
Poput plavih jadranskih talasa.  
Ponekad smo skriveni u mraku  
Zajednički maštali o braku  
ni sanjali o rastanku nismo  
O sudbino vidi sada dismo.

Jednog dana ko u tužnoj priči  
Reče: ja ću u Njemačku ići  
Ti ostani kod svoje mamice  
Pisat ću ti sa prve stanice.  
Pisat ću ti i misliti na te  
Slaću tebi pola svoje plate.  
Hoću dušo samo ti ne pati  
Slike će mo jedno drugom slati  
Brzo ću ja sa autom doći  
Pa ćeš sa mnom u Njemačku poći.  
Već su prošle i godine dvije  
Mili Bože dragi gdje li mi je  
Patim za njim nesrećnica mlada  
Dal će doći u Bosnu nekada.

Dvi godine to je vječnost cijela  
Nema pisma do kreševskog sela  
Piši dragi na staru adresu  
Da mi pisma samoću odnesu  
Za mene si ti još uvijek cvijeće  
Koje vrijeme osušiti neće.  
Piši dragi ako nemaš marke  
Ja ću tebi poslat hiljadarke  
Znam da ovo neprirodno zvuči  
Do tebe je, brzo se odluči  
Ostavi me poželi mi sreću  
Ja ti više dosađivat neću.

Nekada smo ljubav dijelili  
Ni od koga mi to nismo krili  
Volila sam srce sam ti dala  
Nova ljubav na put nam je stala.  
Mama ne da da ja tebe tražim  
Svome srcu boli da ublažim  
Ona kaže da sam cura mlada  
I da ću se udati nekada.  
Kad se vratiš možda će bit kasno  
Jer ću drugog zavoliti strasno  
Klet ćeš dragi aute i marke  
Neće vrijedit tvoje hiljadarke  
Ako bude po savjetu majke  
Kraj je našoj ljubavi iz bajke.



## PUSTI ME DA SANJAM

Čekah te dugo  
Ja prosjak tvoj  
Prosjak ljubavi  
Cvijete mirisni  
I u san tako otplovih.  
Sanjam da sam u raju  
Samnom je princeza mala  
Kuju mi bajka dala.  
Tiho joj velim da želim  
Milovat kosu i stas  
Tako se razvi ljubav  
Duboka između nas.

Ljubim joj usne snene  
I plave oči njene  
Bješe to, Bože, slatko  
Ali potraja kratko.  
Ona me probudi iz sna  
Nestade zanosnog sjaja  
Reče mi idi dalje  
Bježi što dalje od raja.

Pusti me princezo, pusti  
Da pijem miris cvijeta  
Želim uz tebe biti  
Makar na kraju svijeta.  
Pusti me ljubavi, pusti  
Tek sam spoznao sreću  
Hoću da budeš miris  
U mom vrtu i cvijeću.

Ne tražim ljubavi puno  
Kao prosjak te molim  
Pusti me da budem s tobom  
Pusti me da te volim.

## **SJEĆAM SE**

Pupoljak ruže  
Opojan miris  
Čežnjivi pogledi  
Lagani mimohod.  
Duga čekanja  
Izazov srca  
Skupljena hrabrost  
I prve riječi.  
Ljubavni zagrljaj  
Šapat o sreći  
Lijepi su dani  
Kad smo pijani  
Slatki užitak  
Ljubavni napitak.

Iz dana u dan  
Gubi se san  
Budim se pijan  
Putujem sretan.  
Život pun sreće  
Brže proteče  
Zakovitost to je  
Kad se vole dvoje.

## **STVARAM LJUBAV**

Volim sunce  
Jer me grije  
Volim ženu  
Kad se smije  
Volim kišu  
Jer mi vraća dah  
Volim svjetlost  
Jer mi pokazuje put  
Volim noć  
Jer mi otkriva zvijezde  
Volim veselje  
Jer mi vraća snagu  
Volim tugu  
Jer mi otvara dušu  
Volim prepreke  
Jer su mi izazov.

Volim da volim  
I da stvaram ljubav  
Jer jedino ljubav  
Briše zaborav.

## **ORIJENTIR**

Izlazak sunca  
Najavljuje jutro  
Pokazuje istok.

Nicanje mahovine  
Pokazuje sjever  
A sunčer zalazak  
Označava zapad.

Samo tužno srce  
Isijava tugu  
Dok nas južni vjetar  
Nosi prema jugu.

A ti draga moja  
Tu gdje nam je dom  
Pokaži mi put  
Prema srcu tvom.

## NEMA TE

Nisi tu  
Primjetih  
Osjetih...  
Nema Te  
Osta čežnja  
Pusta želja...  
Srce nije kamen.

Poželih Te  
Vidjeti  
Čuti  
Osjetiti...  
Srce nije kamen.

Pitah gdje si  
Pitah jutro  
Dan i noć  
Pitah  
Hoćeš li mi doć  
Šutnja znamen...  
Srce moje  
Nije kamen.

Pođi  
Dođi  
Žuri  
Juri  
Zapali me  
Kao plamen  
Jer srce mi  
Jer srce mi...  
Nije kamen.

## **LJUBAV I SUDBINA**

Volio sam tebe draga  
I ti si mi uzvraćala  
Ali pravu ljubav draga  
Sudbina nam nije dala.

Nikad nisam slutio  
Da će doći tužan dan  
Da ćeš drugom otići  
A ja ostat sam.

Kako draga zaboravi  
Sve trenutke naše sreće  
Kad je ljubav cvjetala  
Ko proljetno cvijeće.

Zašto smo se rastali  
Kada sam te volio  
Tvoju ljubav do danas  
Nisam još prebolio.

## VJETAR JE KRIV ZA SVE

Vjetar nanese miris ruže  
Te opi dušu moju  
Opijum me učini robom  
Ljubav prva i čežnja za tobom.

Vjetar te donese meni  
Onoga davnog dana  
Bez riječi bijaše susret taj  
usne se opijaše, uđosmo u raj.

Vjetar nam šaputao priče  
Zagrljeni tražili smo sreću  
Život nas je vodio, ali kuda  
Naiđe sudbina luda.

Vjetar te odnio kroz život  
A meni nanio tugu  
Pozdrave sam ti slao  
Gdje si, nisam znao.

Vjetre idi i traži je  
Putuj na sve strane  
Ako je pronađeš ti  
Reci neka se vrati.

## KAD SI ZALJUBLJEN

Ni ruža crvena  
Tako lijepa nije  
Koliko ljepota  
Što iz tebe bije.

Ni sunčeva svjetlost  
Nema takav sjaj,  
Na tvome se licu  
Odslikava raj.

Ni miris ljubice  
Što se poljem širi  
Ne može mi dušu  
Kao ti da smiri.

Ni pjesma slavuja  
Nije kao tvoj glas  
On je tiha glazba  
Koja spaja nas.



## **POSVETA TEBI**

Gledam te izbliza  
Dok cvjetaš i listaš  
U očima mojim  
Kao zvijezda blistaš.

Mila si i lijepa  
Od glave do pete  
Moje misli kradom  
Prema tebi lete.

Ljubozovom tvoje  
Nježne grudi zrače  
Oči mi i ruke  
Toplinom privlače.

Opijam se tvojom  
Zanosnom ljepotom  
Nikome te nedam  
Kunem se životom.

## **VOLJEH TE**

Voljeh te  
I željeh  
Kao majka  
Čedo  
Kao slijepac  
Oči  
Kao zemlja  
Kišu  
Kao cvijeće  
Sunce,  
Kao rob  
Slobodu  
Kao zalutali  
Što se vraća  
Rodu.

Želio sam Te  
To bijaše  
San  
Ne znam  
Dal sam bio  
Trijezan  
Ili pijan  
Ili su to bile  
Tek fatamorgane  
Iz moga sjećanja  
Iz mladosti rane.

## TVOJE OČI

Kao tvoje oči  
Ima samo mala  
Snjeguljica iz bajke  
Mašta joj ih dala.

Tvoje plave oči  
Kao dragulj sjajne  
U životu mome  
Otkrivaju tajne.

Ja zavoljeh oči  
Tog maloga bića  
Šta se dalje zbilo  
Ljubavna je priča.

Ni sanjao nisam  
Da je biće tuđe  
I da će duboko  
U srce da uđe.

## **TEBI PJEVAM**

Tebi pjevam ovu pjesmu  
Saslušaj me draga ti  
Pjevat ću ti o istini  
Koju trebaš saznati.

Patim, venem i tugujem  
Lutam, tražim tebe sada  
Otišla si u tuđinu  
Ostavila mene mlada.

Ne muči mi dušu čednu  
Poruku ti šaljem pravu  
Voliš li me kao nekad  
Il' sam u tvom zaboravu.

Javi mi se mila moja  
Pošalji mi buket riječi  
Istinu mi draga reci  
Bolnu dušu mi izliječi.

## **RECENZIJE**

**Ivo Mijo Andrić**

## **PJESMA KAO MOGUĆNOST RENESANSE DUHA**

Nakon tri do sada objavljene knjige, pjesnik Anto Stanić javlja se svojim novim poetskim rukopisom. Riječ je zapravo o tematskome izboru najuspjelijih pjesničkih ostvarenja iz njegovih zbirki “Biseri ispod Inča” i “Poetske kovanice iz Kreševa” dopunjenih s više desetaka novih pjesama, koje do sada nisu objavljivanje.

Autorova je namjera da ovom knjigom izrazi zahvalnost svojim sinovima i obitelji za sreću i životne radosti, koje mu daruju ostvarujući zavidne poslovne uspjehe u razvoju tvrtke “Stanić” na dobrobit građana BiH i Hrvatske, gdje su izgradili i osnovali više proizvodnih poduzeća. Stanić se na taj način zahvaljuje svojim najbližima, ali i brojnim dobrim ljudima, koji su na različite načine doprinijeli razvitku obiteljskog biznisa i pokretanju ratom uništenoga gospodarstva na našim prostorima. To, kao i plemenito nastojanje da pjesmom vrati osmijehe na zabrinuta lica ljudi, čija je egzistencija ozbiljno ugrožena zbog usporenog gospodarskog razvoja i opće nezaposlenosti, dovoljan su razlog da zbirci “Zlatni stihovi” otvori siguran put do čitatelja.

Anto Stanić se ovom knjigom svrstava u red iznimno angažiranih bosansko-hercegovačkih i hrvatskih pjesnika, koji svojim humanim poetskim porukama pridonosi širenju svijetloga ozračja među ljude, osobito one kojima je potrebna lijepa riječ i pružena ruka ljudske dobrote. Potvrđujući svoju, od ranije znanu misiju dobrotvora, Stanić sav prihod i od ove knjige namijenio je socijalnim i humanitarnim ustanovama i organizacijama. Ističemo to kao primarnu dimenziju njegove pjesničke pojave, s ciljem da i druge autore potaknemo da svoju spisateljsku misiju stave u funkciju širenja razumijevanja i dobra među onima kojima je to najpotrebnije.

Knjiga “Zlatni stihovi” sastoji se od četiri pjesnička ciklusa s naslovima “Za moje najdraže”, “Životni putokazi”, “Zvuk rodnog kraja” i “Pusti me da sanjam”. Svaki od navedenih ciklusa otkriva bogatstvo duha i neiscrpn i vrt ljubavi koju pjesnik Anto Stanić gaji i osjeća spram svojih najdražih: djece, unuka, nevjesta i svih onih s kojima dijeli radosne trenutke života.

U prvom ciklusu pjesnik nas uvodi u svijet svoje intime, otkrivajući obiteljske korijene Stanića, koji su u kiseljačko-kreševski kraj doselili iz Dalmacije. Zanimljiv je bio taj put, kao što je zanimljiv i pjesnikov jednostavni način arhaičnoga deseteračkog pjevanja o tegobnom životu naroda bosansko-hercegovačkoga. Krećući se u okvirima tradicionalnog pjesničkog kazivanja, Anto Stanić iskazuje pjesnički dug prema majci, koja je središnja ličnost u poetkom stvaralaštvu mnogih poznatih i manje poznatih pjesnika. Njegovu zahvalnost majci, kao najdražem i

najvjernijem biću u našim životima, karakterizira toplina osjećanja i zahvalnosti za sve što je činila i što čini za dobro svoje djece. Uz dirljive pjesme posvećene majci, u ovom ciklusu posebne pažnje vrijedna autobiografska pjesma “Luca i ja”, u kojoj pjesnik čistim desetercem riše svoju obiteljsku sliku u kojoj su tri sin slatom optočena. U toj pjesmi Stanić zapisuje i stih: “Sve ideje o uspjehu brate, od Boga su u glavu im date” koji je zlatna nit njegova pjevanja i koji je, zapravo motto ove knjige.

Drugi ciklus naslovljen kao “Životni putokazi” pjesnikova je poruka, koja rad stavlja na pijadastal svega što čovjek ima i što može dati. Od rada sve započinje i s radom se sve svršava, ako čovjek kani biti ljudskim bićem i ako želi opravdati svoju časnu povijesnu misiju među inim živim bićima. U tome ciklusu pjesnik savjetuje, ukazuje, napominje i opominje sve one koji su zaboravljali, koji zaboravljaju i koji će zaboravljati istinu da je rad stvorio čovjeka i da se čovjek samo radom potvrđuje kao super-ego i tvorac svega što je stvoreno, uz ono što nam je od Boga dato. Pjesnik je racionalni vjernik, koji vjeruje u ono što vidi i koji vidi ono u što vjeruje.

Do kraja odan svome rodnom kraju, Anto Stanić u trećem ciklusu osluhuje zavičajne zvuke, što obdan i obnoć trepere i prate ga na životnome putu na kome se, blagodareći umu i radu, i trnje u ruže prometnulo. Tako je to kad se riječ preobrazi u pjesmu, a san u zbilju, kada sreća ne okreće leđa, kada nas vodi u svoj rajski svijet.

Na krilima sna lebdi i putuje pjesnikova ljubav, koja je domaćin u svakoj pjesmi uvrštenoj u četvrti ciklus pod naslovom “Pusti me da sanjam”. Ljubav je podjednako i san i java i lijepa slika i okvir bez slike. Ljubav je sunce i oblak pred suncem, vidna opsesija i gola vizija. Ljubav je pjesniku duhovna snaga i tjelesna hrana, pokretač koraka i kreator misli. I što bi ljudi da nije ljubavi? Kakva bi nam bila prošlost i budućnost?

Pjesnik Anto Stanić izatkao je knjigu “Zlatni stihovi” nitima koje spajaju pokidane veze, koje našu nadu vezuju za sreću i koje nam nude izlaz iz tunela zatamnjene zbilje. Zato ovu knjigu treba primiti čista srca i s krajnje dobrim namjerama. Jer, samo tako ona će biti svjetionik koji ljudima dobre volje otkriva da smo mi zemlja nade, a ne pusti otok beznađa.

U tome i jeste njezina temeljna vrijednost i razvidna snaga i poruka.

**Momir Jolović**

## **KNJIGA VELIKOG ŽIVOTNOG ISKUSTVA**

Anto Stanić se svojim knjigama “Biseri ispod Inča” i “Poetske kovanice iz Kreševa” već ogledao u poeziji i predstavio čitaocima zavičajnim, ljubavnim, nostalgičnim, patriotskim i drugim pjesmama. Čvrsto vezanuz svoje Kreševo, iznad kojeg se kao džin izdiže Inač, što je pjesniku jedan od motiva, želi ovo svoje živopisno rodno mjesto još više obiseriti motivima i kovanicama iz svoje dosta bogate leksike, s njegovog vlastitog nakovnja, ispod drvenog čekića koji je naslijedio i kojim uspješno kuje stihove i životne uspjehe. Njegovi proizvodi su i tvrdi i mekani, i sjajni i grubi, sve u zavisnosti od mjesta i vremena iskivanja.

Ova njegova nova knjiga “Zlatni stihovi” rodila se iz velikog životnog iskustva, koje pjesnik želi prenijeti na mlađe naraštaje i time im pomoći da lakše savladaju prepreke koje im život postavlja. Bez postavljenog cilja nema ni uspjeha u životu i radu. To je ono najvažnije na što pjesnik ukazuje mladima.

Njegovo djelo obiluje senzibilitetom, velikim brojem metafora, dobro odabranih epiteta, Ilirskih slika kako vizuelnih, tako i akustičnih. Jednostavno, ovo djelo je putokaz u životu u kome čovjek ne smije pokleknuti, izgubiti moral i gledati sve crno.

Cijela je knjiga prožeta životnom filozofijom bogatog iskustva i znanja, koje je pjesnik sticao gazeći trnovitim putem sve do cvjetnih livada kojima sada korača ubirući plodove svoga truda i rada. On nam savjetuje da se u životu oslanjamo na znanje i rad, a ne na sreću, jer apsolutna sreća ne postoji.

Pjesnik je pobornik mira i sloge. On osuđuje ratna trvenja i sve što je neljudsko: nasilje, egoizam i nerazum. Gotovo svaki njegov stih nosi pouku i poruku. To knjizi daje posebnu vrijednost i čini je zanimljivom za čitaoce. Zato je preporučujem svima koji vole dobru poeziju i koji uvažavaju znanja i iskustva drugih ljudi.



## SADRŽAJ

Principi uspjeha  
Proslov

### ZA MOJE NAJDRAŽE

Moje stablo  
Majko hvala ti  
Posveta majci  
Luca i Ja  
Na skijanju

### ŽIVOTNI PUTOKAZI

Životni putokaz  
Raskini okove  
Pokidaj lance  
Uradi sve danas  
Pazi čovječe  
Knjige  
Knjigocid  
Smij se  
Orijentacija u vremenu  
Besmrtnom  
Jučer je prošlost  
Poruka  
Jedan je Bog  
Nebo plače  
Uzaludan vapaj  
Za našu zemlju  
Molba za mir  
Nikad ne zaboravi  
1990.- Vizija rata

## ZVUK RODNOG KRAJA

Ja sam produkt  
Moj zvuk  
Odlazak u Njemačku  
U posjeti selu  
Selo moje  
Prokoško jezero  
Ružica  
Sjenica  
Poklon  
Opio me miris cvijeta  
Pomozi mi Bože  
Apsolutna sreća  
Čaša ljubavi  
Ja sam čudo  
Ne zovi me sine

## PUSTI ME DA SANJAM

Pismo  
Pusti me da sanjam  
Sjećam se  
Stvaram ljubav  
Orijentir  
Nema te  
Ljubav i sudbina  
Vjetar je kriv za sve  
Kad si zaljubljen  
Posveta Tebi  
Voljeh te  
Tvoje oči  
Tebi pjevam

## RECENZIJE

**Anto Stanić**  
ZLATNI STIHOVI

**Urednik:**  
Ivo Mijo Andrić

**Izdavač i štampa:**  
“Štamparija Fojnica” d.o.o. Fojnica

**Za štampariju:**  
Šehzija Buljina

**Su nakladnik:**  
HKD “Napredak” Kiseljak

**Za su nakladnika:**  
Ivo Miro Jović

**Tiraž:**  
1000 primjeraka

2002.